

NAQQIUT

Akissuteqaat 14. april 2016-meersoq taarserpaa

(Makku naqqiutigineqarput: “najugaqartut peqatigiiffiinut” taarserpaa “najugaqartut immikkoortorta qarfiinut”)

Innuttaasut immikkut tamarmik kiassarnermut atukkaminnik taamaallaat akiliisaleqqullugit, Nukissiorfinnit kiassarneqartut tamarmik immikkut uuttuutilersorneqarnissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut. Tamanna aallarteqquneqarpoq kingusinnerpaamik ulloq 1. januaari 2017.

(Inatsisartuni ilaasortaq Michael Rosing, Demokraatit)

Akissuteqaat

(Pinngortitamut, Avatangiisinut Inatsisinillu Atuutsitsinermut Naalakkersuisoq)

Siullermeerneqarnera

Naalakkersuisut sinnerlugit Inatsisartuni ilaasortaq Michael Rosing Demokraatiniit aalajangiiffigisassatut siunnersuuteqarneranut qutsavigaara.

Aallarniutigalugu erseqqissaatigerusuppara, isuma, siunnersuuteqarnermut tunngaviusoq, Naalakkersuisut paasilluarmassuk. Inuit amerlanerpaat kiassarnermik atuinerup inoqutigiinnut immikkut agguarlugu naatsorsorneqartarnissaa, aammalu taamaallaat nammineq kiassarnermi atukkat akilerneqartarnissaat naleqquttutut isumaqarfigisinnaagaat qularinngilluinnarpara. Kiassarnermi sipaaraanni aamma akiligassat ikinnerulertariaqarput. Tassalu immikkut uuttuusersuineq avatangiisinut inuillu ataasiakkaat aningaasaqarnerinut iluaqutaasussaavoq.

Kiassarnermut immikkut uuttuutit amerlineri arlalinnik iluaqutissaqartussaavoq. *Inuiaqatigiit* eqqarsaatigalugit nukimmik atuineq sipaarfiusussaavoq, innuttaasummi kiassarnermi sipaaruteqarpata, uulia nukissiuutillu alla annikinnerusoq atorneqartussaavoq. Kiassarnermi nukimmik atuineq annikinnerulerpat, tamanna aamma silap pissusianut iluaqutaasussaavoq, gassit silaannarmik kissatsitsisartut aniatinneqartut annikinnerulertussaammata.

Innuttaasut eqqarsaatiginerullugit innuttaasut kiassarnermi sipaagaqarlutik qaammammut aningaasanik sipaagaqartalertussaapput, allat annertuumik atuinerannut akiliisarunnaartussaagamik. Kisiannili innuttaasut kiassarnermut annertuumik atuisuusut akiligassaat amerlanerulersussaapput. Kiassarnermi sipaagaqarnissaq – avatangiisinillu eqqarsaateqarnissaq – tamanut kajuminnarnerulersussaavoq.

Taamaattumik Naalackersuisut siunnersuummut isumaqataapput.

Inissianili pisoqaasuni amerlasuuni kiassarnermut ruujorit ikkussugaanerat pissutigalugu siunnersuut teknikkikkut unammilligassanik arlalinnik nassataqartussaavoq. Inissiani pisoqaanerusi kiassarnermut ruujorit amerlanertigut inissiat akimorlugit ikkussugaasarput, taamaalillutik sanilip najugaanut inimut, taamatullu utimut ikkussugaasarlutik. Tassalu kiassarnermut ruujorit inissiaq tamakkerlugu aqqusaarseqqaatanngillat, kisiannili inissiat akimorlugit ikkussugaasarlutik, taamaattumillu ajornartorsiut imaaliallaannaq aaqqinneqarsinnaanngilaq. Maanna ruujorit ikkussugaanerat peqqutaalluni inissiat ataasiakkaat uuttuummik ataatsimik ikkussiffigineqaannarsinnaanngillat.

Teknikkikkut unammilligassanut atatillugu aamma aperisoqartariaqarpoq, namminersortut inissiaataat tamarmik kiassarnermut immikkut uuttusersorneqarnissaat pisariaqarnersoq? Inuiaqatigiit aningaasaqarnerat eqqarsaatigalugu – illut nutartertariaqalersut kiassarnermut immikkut uuttusersorneqarnissaat isumatusaarnersuut eqqarsaatigineqartariaqarpoq. Taamatuttaaq tamakkiisumik atortulersuinissamut aningaasaliissutissat qanoq ilusilerneqassanersut, aningaasartuutissallu siunnersuummi siunnerfigineqartutut attartortunut imaluunniit najugaqartut immikkoortartaqarfiinut akiligassanngortinneqarnissaat naapertuunnersuut eqqarsaatigineqartariaqarpoq.

Inaarutaasumik aalajangiisoqannginnerani teknikkimut tunngatillugu ajornartorsiutit, apeqqutit isumaliutersuutillu taamaattut oqallisigineqartariaqarput akineqartariaqarlutillu.

Tassalu innuttaasut Nukissiorfinnit kiassarneqartut tamarmik kiassarnermut immikkut uuttusersorneqarnissaannut inaarutaasumik isummertoqannginnerani, teknikkimut aningaasaqarnermullu sunniutissat siunnersuutit kingunerisassai suunersut pillugit tamakkiinerusumik tunngavissiortoqarnissaa pisariaqartinneqarpoq.

Taamatut oqaaseqarlunga Naalackersuisut sinnerlugit allannguutissat siunnersuut una saqqummiuppara:

”Nassuiaammik, maanna ataatsimut akiliisitsiviusartuni kiassarnermut immikkut uuttusersuinissamut pisariaqartitsinermik, aammalu Namminersorlutik Oqartussat inissiaataanni pioreersuni kiassarnermut immikkut uuttusersuinermi teknikkikkut unammilligassanik nassuiaateqarfiusumik suliaqarnissamut Naalackersuisut pisussaaffilerneqassapput. Nassuiaammi innuttaasut Nukissiorfinnit kiassarneqartut tamarmik kiassarnermut immikkut uuttusersorneqarnerinut teknikkikkut aaqqiissutissat pitsaanerpaat saqqummiunneqassapput. Kiisalu nassuiaammi Namminersorlutik Oqartussat inissiaataanni tamani kiassarnermut immikkut uuttusersuinermi aningaasaqarnermut sunniutissat isummerfigineqassapput, taamatullu nassuiaammi aningaasalersueriaatsit suut atortariaqarnersut saqqummiunneqassaaq. Nassuiaat 2017-imi upernaakkut ataatsimiinnermi agguanneqassaaq.”

Nassuiaammi suut siunnerfigineqarnissaannut nassuiaasiorluni sulinermut ilagitillugu
Naalackersuisut siunnersuutigaat, allannguutissatut siunnersuut Inatsisartuni inaarutaasumik
isummerfigineqannginnermini ataatsimiititaliami suliarineqassasoq.